

անցած էր: Մեր հարաւն Ղլիճ հետուկի շղթայն, որոյ հարաւն զանուած Անդափ գաւառակի լեռներն, որոյ վերայէն ևս Սիփանայ մեծ լեռն և Ալատաղի ի հարաւ արեւմուտս խոնարհած լեռնաշղթայն, որ մեր արեւելեան հարաւն կընկնի և կը բաժանէ զՍամուր (Ճաղիտոն) յԱրձիշոյ ևն:

Մեր բուն նպատակն էր մասնաւոր ակնարկ մի ձգել Թոփրագ-գալէի քաւշանի վերան, որ կայր Խաչու և Խոփուզ գետակաց միջավայրն, ուր և մենք կանգնած ենք, մեր աջ և ձախ կողմերէն ի հարաւ կը հոսին:

Քաւշանիս դաշտային մասը կը տարածուի զիւղաքաղաքէս ի հարաւ մինչև Միրանկներ, որ բերդիս կը պատկանի և փոքրիկ մի քրդական զիւզ է և որոյ յարեւմուտս կարասու, որ մասամբ ճահճային վայր մէ ուր կան գեղեցիկ գոյնզգոյն ծաղիօք զարդարուած մարգագետիններ:

Մեր կեցած բլրակից արեւմտեան հարաւ կը հոսի Շահիօլի ջուրն, Խոփուզի ջրոյն կը խառնուի, իսկ ի հարաւ յարեւելս կը հոսի նաև մի ջուր որ Չիչխան գետանունով գերեզմանատան $\frac{1}{2}$ ժամ յարեւելից անցնելով դաշտի մէջ Խաչուայ գետակին կը միանայ:

Այս ջուրն թէև փոքր, սակայն ընթացքին վերայ կակուզ հողի և թոյլ ժայռերու պատահելով խիստ խոր անդունդներ կազմած է:

Մեր կանգնած լեռան արեւելեան ստորոտն, մերձ Խաչու գետակին կայ մի փոքրիկ ձորակ. այս ձորակի մէջ կան քանի սառն աղբիւրներ, ձորակի երկայնութեան վերայ կան 25-ի չափ հինաւուրց մնացած ուռի ծառներ, որ մի կարգի վերայ շարուած են, այս ծառներն նուիրական են, որոց մարգ չմերձենար: